



Ofisina Sentral di Statistik

Inlichtingen: (+599 9) 724-1802

Adres: WTC Building, Piscaderabay z/n

E-mail: info@cbs.cw

Website: www.cbs.cw

Facebook: cbscur

Komunikado di Prensa

Willemstad, 12 di yuni 2025

Promé resultado di e Produkto Interno Bruto Real di Kòrsou – 2024

Ekonomia di Kòrsou a krese ku 5,0 porshento den 2024

Willemstad; Según e promé estimashon di CBS pa 2024, basá riba e dato disponibel aktual, e produkto interno bruto (PIB) real a subi ku 5,0 porshento kompará ku e aña anterior. Esaki ta indiká ku ekonomia ta krese pa kuater aña konsekutibo. E oumento den e PIB real ta prinsipalmente atribuí na un fuerte oumento den kantidat di turista ku ta keda hospeda na nos isla, tambe na un kresementu konsiderabel den sektor di konstrukshon i e sektor di transporte.

E Produkto Interno Bruto real (tambe yama PIB na preis konstant) ta midí e grandura di e ekonomia. E kambio den volumen di e PIB real den un sierto periodo ta sirbi komo indikador pa kresementu òf bahada ekonómiko. E dato di e promé estimashon di PIB real ta preliminar, pasobra no tin datonan kompletu di tur e sektornan di negoshi.

Sektornan ku kresementu fuerte

- **Horeca (hotel i restaurant):** E aktividatnan di produkshon den sektor di horeca a krese ku 18,0 porshento den 2023 i a sigui desaroyá te na 18,8 porshento den 2024. E sektor ta sigui benefisiá di e rekuperashon i oumento den turismo i rekreashon, despues di un periodo di stagnashon algun

aña pasa. Esaki ta indiká un oumento den turista ku ta keda hospeda i den kantidat di anochinan ku nan ta pasa riba nos isla. E situashon aki tambe a sòru pa un ‘spin-off’ den otro sektornan.

- **Transporte:** E aktividatnan di produkshon den e sektor aki a krese ku 13,9 porshento den 2023 i a sigui krese te ku 19,1 porshento den 2024. Esaki ta reflehá un oumento den aktividatnan di haf i aeropuerto, ku esun último a lográ un rekòrt di 2.117.605 moveshon di pasahero.
- **Industria:** A konose un kresementu di 6,5 porshento den 2023, sigui pa un oumento más fuerte di 7,0 porshento den 2024. E kresementu den 2024 ta motivá pa un demanda mas grandi pa produkto i servisio pa eksportashon i tambe e efekto di turismo riba e sektor. Esaki ta subrayá importansia di e sektor industrial den e struktura ekonómiko.
- **Konstrukshon:** A pasa for di un oumento modesto di 0,9 porshento den 2023 na un oumento fuerte di 10,4 porshento den 2024, indikando un kresementu importante den e sektor. Esaki ta indiká ku invershonan den infrastruktura, bibienda òf proyektonan komersial tabata mas den demanda.

Sektornan ku ta bai ménos bon òf ta kontrayendo

- **Enseñansa i Kuido di salú:** Enseñansa konose un kontrakshon di 3,4 porshento den 2023, pero a mehorá un tiki den 2024 ku un bahada di 0,9 porshento. Di otro banda, e sektor di salú a bai mas atras den sifra: for di un kontrakshon di 3,8 porshento den 2023 na un di 5,8 porshento den 2024. Esaki por ta indiká falta di personal, redukshon di gastu òf restrukturashon den e sektor.
- **Komunikashon:** For di un kresementu modesto di 0,9 porshento, e sektor a baha na un nivel di 1,4 porshento.
- **Otro servisio:** For di un oumento di 2,1 porshento, e sektor aki a eksperensia un bahada di 1,3 porshento, ku por indiká un deterioro den e sektor di apoyo.

Ekonomia mundial

Den 2024, segun e “World Economic Outlook” di Fondo Monetario Internashonal (IMF), e ekonomia mundial ta kalkulá ku tin un kresementu real di 3,3 porshento, esaki ta un tiki mas haltu ku e 3,2 porshento di 2023.

E región Karibe ta mostra un fuerte kresementu di 12,1 porshento, espesialmente den ekonomianan ku ta dependé di turismo, ku na promedio ta krese ku 2,5 porshento. Den e grupo aki, Kòrsou ta figurá ku un kresementu di 5,0 porshento den 2024, ku ta komparabel ku e tendensia di kresementu den e región Karibe i ekonomia mundial.

Pa informashon tokante otro sektornan di negoshi i mas detaye tokante desaroyo ekonómiko di 2024, por download e artíkulo “Desaroyo Ekonómiko 2024: Ekonomia ta sigui krese memei di desafionan.”, via e website di CBS: www.cbs.cw

////////////////////